

Raps che dattan milliuns

Il survegliader dals pretchs lavura per nus tuts

DA LUCAS DEPLAZES / ANR

■ En sia lavur da l'onn 2018 ha il survegliader dals pretchs examinà il svilup dals custs per la sanadad e prendi sut la marella la situaziun sin il sector da l'infrastructura publica. El ha critigà las grondas differenzas da las tariffas en las chasas da tgira e sincerà che las taxas da las brevs restian.

Ils custs per la sanadad en il focus

Quai saja nair temp da sa fatschentiar pli intensiv cun ils custs per la sanadad sin il plaun politic, ha constatà *Stefan Meierhans*, il survegliader dals pretchs, a chaschun da la preschentaziun da ses rapport 2018 a Berna. Dapi passa diesch onns ha il survegliader dals pretchs fatg attent al svilup sfrenà dals custs per la sanadad sin ils divers secturs. Capità n'è dentant nagut. Sin fundament d'in'analisa dals experts (naziunals ed internaziunals) ha il cussegl federal formulà diversas propostas per stabilisar ils custs e mess quellas en consultaziun. Tenor Meierhans van quellas mesiras en la dretga direcziun, ma ellas n'èn betg suffizientas per franar il svilup surfatg dals custs. Per quest motiv vegn il survegliader dals pretchs a perseguir vinavant la situaziun e formular propostas da spargn. Las diversas examinaziuns per generica demussan ch'ils pretchs en Svizra èn bier memia auts e ch'il diever da generica è fitg modest. Per ils pajapremias muntia quella situaziun ina greva chargia da tschients milliuns francs. Meierhans pretendia dapi onns in pretsch da referenza. Finalmain dat quai moviment sin il sector da sanadad, ha constatà Meierhans. En vista a las eleziuns da quest atun fan uss tuttas partidas propostas per refurmas.

Grondas differenzas tar la tgira

Meierhans ha cumpareglia il custs per la tgira en asils da vegls. Sia analisa demussa differenzas inexplicitgabladas da las taxas da tgira en ils divers chantuns da fin 100 francs per di. El ha constatà che diversas chasas da tgira fan buns gudogns che ve-



Il survegliader da pretchs Stefan Meierhans ha preschentà ier a Berna ses rapport annual.

KEYSTONE

gnan impundids per la tgira da malsauns. Talas subvenziuns cruschadas cunterfan a la lescha, ha confermà il Tribunal federal. Ils custs per la tgira dals malsauns ston en mintga cas surpigiar ils chantuns e las vischnancas. Meierhans ha fatg propostas per mauns dals chantuns e spetga ch'ils chantuns controlleschian e coordineschian meglier la finanziaziun.

Squitsch sin las Viefiers federalas

Cun grond squitsch ha Meierhans pretendi da las Viefiers federalas (VFF) che quellas dettian vinavant als clients la reducziun da la taglia sin la plivalur. Finalmain ha el pudì realisar diversas reduc-

ziuns en la summa dad 80 milliuns francs per l'onn 2018. Las VFF prevesan proximamain in augment da las tariffas. Meierhans vul restar vinavant en contact e procurar ch'il traffic public restia vinavant attractiv.

Nagin augment per las brevs

Grazia a la cunvegna cun il survegliader dals pretchs restan las taxas per las brevs A e B vinavant sco fin uss. Plinavant relascha La Posta definitivamain las taxas da dazi per spediziuns postalas da l'exteriur. Senza l'intervenziun dal survegliader dals pretchs avess La Posta già daditg auzà ils pretchs per la brevs. Quai è era

stà il survegliader dals pretchs, Meierhans, ch'ha fatg attent ils responsabels da La Posta – già avant blers onns – che la moda e maniera d'incassar subvenziuns per il traffic dals autos da posta na saja betg correcta.

Dismessa da ruments

L'ultim temp è stà fitg activ il survegliader dals pretchs sin il sector da la dismessa da ruments e dal provediment d'aua. Tar implants per arder rument ha Meierhans cuntanschi in'enlegientscha. Per il sector da provediment d'aua ha el surdà a las vischnancas recumandaziuns per la composiziun da las tariffas.

Impedir prezis nungustificai

En connex cul svilup economic en Svizra dils onns siatonta ein certs prezis sco terren per baghegiar, tscheins, carischia explodi. Quei ha intimau las organizaziuns naziunals dils consuments da procurar per daplì controllas arisguard prezis per survetschs che mintgin drova. Già igl onn 1975 ha il parlament federal decidu da controllar ils prezis e las pagas duront in temps limitau.

Igl onn 1979 han las organizaziuns dils consuments inoltrau in'iniziativa dil pievel ch'ha pretendiu ina survegionza dils prezis. Il pievel ha susteniu quella igl onn 1982. Ils 20 da december 1985 ha il parlament acceptau la nova lescha davart la suvigionza dils prezis e revediu quella 1991. La lescha pretendia ina consultaziun dil suvigilader da prezis en cass ch'ils consuments ein finanziaimein pertuccai ed il dretg dil suvigilader da publicar sias recumandaziuns.

Las correcturas ch'il suvigilader da prezis sa pretender ein mintgamai fetg mudestas. Savens settracta ei da raps. En buna memoria ei la decisiun dil suvigilader Leon Schlumpf. El ha pretendiu ina reducziun dil prezi per ina scadiola caffè da tschun raps. En vesta al consum da caffè duront onns ed onns sedat quei tuttina ina considerabla summa.

Las Viasfier federalas levon avon in onn buc adattar ils prezis alla taglia sin la plivalur sbassada sin 7,7%. Meierhans ha fatg uorden. Senz'ina survegionza professiunala e legitimada dalla politica pagassen ils consuments – e quei ei mintgin da nus – milliuns daplì a tals ch'han già avunda.

Suvigiladers da prezis

Leo Schürmann	1972–1974
Leon Schlumpf	1974–1978
Odilo Guntern	1986–1993
Joseph Deiss	1993–1996
Werner Marti	1996–2004
Rudolf Stramm	2004–2008
Stefan Meierhans	2008–